

編號 3 號

【幸福个味緒】李淑娟原作

幸福係麼个味緒？有人會講，係放學時節歸到屋下，對灶下沖出來个爛豬跔香味；有人會講，係阿爸下班過後圓身頂臭汗臊个味緒；乜有人講，係暗晡頭屋背該頭桂花樹淡淡个花香。味緒，看毋著、聽毋著乜摸毋著，蓋趣妙个係，佢總係做得同佢等个回憶厝共下，食著、鼻著共樣味緒个時節，回憶乜會跔等像戲齣樣仔又再放送出來。

吾爸在佢讀國中三年生个時節過身也，因為發現肝癌个時節忒慢，已經第三期。佢辭核頭路拖等發病个圓身做咗年過个治療，丟下吾姆同佢等兩兄弟就轉長山賣鴨卵也！阿爸分佢印象最深个毋係長壽菸个味緒，毋係醫院頂吊射个藥味，加嘎係厥手路菜「番茄炒雞春」个好味緒。

阿爸个「番茄炒雞春」一定愛特別用臨暗頭市場項伸个、有靠傷个、醜投投仔个番茄，因為這下頭家愛收攤也，會半買半相送。佢蓋沙鼻講：「雖然這毋係星級个材料，毋過有阿爸五星級个好手藝啊！」斷真哦！這項菜上桌个時節，啾紅油光油光个番茄，合等該綿綿嫩嫩又黃蠟个雞春，還旨入嘴就先吞口涎也。該

香香又酸酸甜甜个味緒，單淨攪味就做得划核兩碗白飯，這幸福个味緒一直厝在佢个記憶裡背毋會散核。

阿爸做化療該段時間，阿姆天旨光愛先去送牛乳，再趕去工地做小工，無時間煮飯。佢同老弟輒常食白飯傍醬菜、豆腐乳、魚仔罐頭，係無就泡麵加一粒雞春。阿爸愁慮佢等毋罉擺營養，刻耐仔忍等身體个毋鬆爽煮菜分佢等食。每擺酸酸甜甜个味緒食落肚筍，佢个心乜跔等酸酸甜甜，甜个係阿爸惜子个心意，酸个係，毋知還做得再食著幾多擺這幸福个味緒？

對佢來講，幸福就係「番茄炒雞春」該酸酸甜甜个味緒，佢總會帶出佢最深、最甜个回憶，分佢看著阿爸黃蠟个面容項掛等滿足个笑容。這下佢又乜最驚食著這項菜，因為佢驚啊食忒多別家个「番茄炒雞春」，會害佢添放核記憶當中阿爸留分佢个味緒，該阿爸惜子个味緒，佢同阿爸共下个幸福味緒。

編號 5 號

【金蘋果】郭亭好原作

佢蓋驚注射，你係毋係也同佢共樣呢？為著對付這站仔搵射人个惡霸——流感病毒，診所裡背排啊滿滿等等愛注預防射个老嫩大細。細人仔驚啊噉噉滾、噉啊目汁濫泔，看著恁呢个情景，分佢恁起頭擺，該個驚注射个佢，同乖乖注射過後就有个「金蘋果」。

屋下淨佢一個妹仔，阿爸講佢這個心肝妹屎仔係佢同註生娘求來个；佢係去外地出張，歸來个時節定著會跔跔幹去雜貨店買兩罐佢最好咁个蘋果牛乳——「金蘋果」歸來分佢。毋過佢從細嘴斗毋好，歸個人瘦夾夾仔，息把毋堵好就愛看醫生；阿婆毋盼得，講：「你看啊！細人仔畜啊瘦夾夾仔！又不時發病，這愛捨仰得大？」阿爸插等佢个時節也會講：「你看，若腳像鳥腳樣仔，無細義分人拗著就會斷核哦！愛食加兜仔正會大，知無？」

一擺佢發燒，燒啊歸身軟怠怠仔，在眠床項插等被，凍啊激顫。阿爸對外背歸來看啊著，隨就同佢背起來，共快去醫院尋醫生，醫生看咁講：「還係愛注一支射過遽好！」聽著愛「注射」，原旦還手軟腳怠个佢，起腳就愛走，連鞋跌核也毋怕也！

阿爸遽啊逐過來同佢扭等，插轉去凳仔項坐；佢一幹頭，看著護士阿姨拿等一支大大支个注射筒仔在該抽藥水，阿姆哀啲！該佢會死核也！隨就在阿爸圓身項緊奮，毋過阿爸生來大長¹，佢就像分佛祖礮在五指山下个孫猴精，仰仔都走毋出厥个手巴掌。

看著毋著向，佢就開始盡命牯噉，佢等哪有可能恁呢就放佢煞？阿爸用力同佢插核核，再同佢个兩隻腳夾纏，護士阿姨也手板蓋遽，一個同佢个褲頭擲過下兜仔、一個注射，黏時就完成佢等个任務也！單淨留噉啊凜流凜串个佢，伏啊阿爸肩頭抽肱攝氣²。阿爸細細聲溫柔个哀奶佢講：「毋好噉也，恁呢蓋見笑哦！你蓋壁，為著獎勵你，等下阿爸帶你去買你最好个『金蘋果』分你哦！」

在歸去个路項，阿爸用厥該又貴又燒暖个手同佢牽纏纏，佢个嘴項咁等裝有阿爸滿滿个愛个「金蘋果」，頭下注射个痛做下添放核也。佢想，該當時个佢怕係全世界最幸福个人也！想起來，也好得有「金蘋果」陪佢耐過該段驚注射个童年。

¹ 大長：音 tai jiong`；喻身材高大。

² 抽肱攝氣：音 cu` goi` ngiab` hi；因為傷心啜泣而氣息不順。

編號 6 號

【客家烏鶻阿醮】巫沂庭原作

佢做細人仔个時節，畜咁一隻蓋得人惜个烏鶻哥。雖然佢離開佢个身邊去做仙嶺然久咁，毋過佢心肚裡永久會留一個思念个所在分佢。見擺頭腦裡背瞞過頭擺同佢相處个種種，艱苦个心情就一陣一陣湧起來，心肝頭撈撈，像硬硬會哼出來樣仔。

小學三年生个時節，有一日，歇在共莊頭个姨丈對佢做事个所在——金山，帶轉三隻毋曾生幼毛个細烏鶻。「阿姆唷！仰會有恁得人惜个烏仔？」阿爸看啊著就說講。「一隻分佢等畜好無？」阿爸同姨丈要求。

「好啦，自家擇一隻歸去畜麼……。」姨丈有一息毋盼得。

就恁呢，這隻烏仔開始同佢等讓陣，有佢等个所在總會有佢細細个身影。在佢等細心細意个照顧下，阿醮个身胚生啊砸礮又硬程。阿姆下把仔會切兜幼幼个豬肉絲畀食，故所厥毛看起來越致烏金，一等靚。因為厥圓身圓律律仔，故所佢同佢安一個得人惜个名仔——「阿醮」。

聽人講烏鶻曉得學人講話，阿爸毋知哪久走去市場買一個磨

舌枋¹歸來，偷偷仔塞啊阿醮嘴項。有影哦，阿醮親像緊來緊會學人講話咁呢，還生趣啲！

阿爸、阿姆原旦歇在東勢該片，因為阿爸想愛開店做生理，佢心肚裡恁著毋好丟下屋下一個人創業，就帶歸家人上臺北穩定下來。雖然離開東勢去到恁遠个地方，毋過佢等毋識添放核祖宗言。打幫爺哀个堅心，一路里來佢等用大埔腔教佢等兩個細人仔講客，今晡日佢有機會同客話傳承分後輩，這總概愛感謝佢个爺哀。過再講，家庭係傳承母語最好个所在，吶仰仔都毋好丟核正好。

佢等七教阿醮講客，佢講來蓋正，唉哉，佢就係一隻客家烏鶻哥啊！有成時阿爸睡當晝有人客來个時節，阿醮看阿爸還睡等無停動，就會盡命牯一到又一到喊阿爸个名仔，定著愛同阿爸喊到醒，佢正會恬恬無再出聲。這下佢等正發現阿醮還會搯掌生理呢，實在精靈个烏仔。

蓋希望時間頓恬在阿醮還在个時節，有佢讓陣个日仔，佢等每日過啊歡喜又樂暢。前前後後佢陪佢等總共有十五年，實在感心正得！每擺想著佢得人惜个樣式，都會分佢歸個心肝闕闕撈撈，毋得伸揸²……。想愛在心肚裡同阿醮講一句：「感謝佢个青春有你共下，正來寮。」

¹ 磨舌枋：音 noˋ sad bionɡˊ；磨舌板。

² 伸揸：音 cunˊ caˊ；平順。

【莊頭个王爺廟】溫明惠原作

阿婆頭擺歇秀湖，秀湖老頭擺安到山豬湖，想就知老古時代，係做得扭山豬个所在，尾下因為這名仔忒土，正改做秀湖。秀湖係蓋傳統个客家莊頭，上家下屋通棚屋仔起啊自家田項，隔蓋遠正會有鄰舍，王爺廟係這莊頭个信仰所在。

每年舊曆 2 月 25 日王爺生該日，莊頭同平常時个恬靜無共樣，歸莊頭鬧熱煎煎。王爺生對大人來講係蓋重要个活動，對細人仔來講係鬧熱又好搞个事情，故所係秀湖除了過年以外，一等重要个大事。雖然佢等客人敬奉个神明總係過重文神，過無重視武神，毋過因為歇這莊肚裡个人，有保護莊頭个需要，大家就題錢起這莊頭个王爺廟。這王爺蓋靈，本事蓋大，幾十年秀湖一路里來平平安安，莊肚裡个人正經對佢一等信。

為著表示大家對佢个虔誠，每擺王爺做生日，家家屋屋毋係劇雞仔，就係劇鵝仔，全力準備豐沛个飯菜敬神。阿姨、阿舅前幾日就愛開始準備邀親戚來共下搵手劇雞仔。大人無閒泊杈、七手八腳搵劇，先燒正來擲毛，歸下晝跲去跲轉¹。雖然大家無閒啊

汗流脈落，還愛打嘴鼓聯絡感情，有講有嗆。半晝邊仔，劇成十隻雞仔無問題，毋多知乜同歸年个感情補齊也。愛歸个時節一儕擺一隻雞仔做妄想，大家都一等暢。

等到王爺生該日，正正經係做鬧熱。廟坪定著有搭戲棚，請戲班仔來做戲；乜有賣零嗒个、李仔糖个生理人；還一定有兜凳板來號位仔个細人仔，莊頭路脣停啊滿滿个車仔，閃車時節險險閃毋過、貶啊田項。朝晨在王爺廟敬神个牲儀，經過舅姆變食，當晝就變啊一等修菜、香醇醇仔个好料。食過晝，釀茶食啊淡核，菜園乜行蓋多轉也，一直到好客个阿婆硬硬會啄目睡也，大家正準備歸去。

過核恁多年，戲棚下个細人仔變少也，生理人每擺來都在該拓烏蠅，包尾無生理乜毋愛來也。阿婆過身後，阿姨、阿舅邀人劇雞捋鴨个情景乜無再看著也，佢等乜罕得歸秀湖一轉。下把仔，車仔駛過秀湖，莊頭恬索索仔，毋過嗶分佢恹起頭擺王爺廟鬧連連个景象。

¹ 跲去跲轉：音 giab hi giab zon`；喻非常忙碌。